

CAVITQVE ALTARE. Iterum celebratur pietas & zelus Abrami. Vbiq; studet religionem plantare, & purum Dei cultum propagare inter Ethnicos. Nec dubium, Mamre & duos eius fratres ab eo de Deo recte institutos fuisse: alioqui vix amici fuissent. Sic Deus tūc etiam Ecclesiolam collegit inter gentes. Porro Hebron querceto Mamre vicina vetustissima ciuitas dicitur ædificata se-

ptem annos ante Tanim Ægypti Num. 13. 23. hoc est, vt quidam volunt, ante diluuium: prius dicta Kiriat-Arba: hoc est, ciuitas quadrina siue quadripertita: nā ערבה quatuor sonat: vel ciuitas Arba, qui fuit vnus ex Enakim Ios. 14. 15. Cessit in diuisione Calebo: Sedes regni Dauidis per septennium in tribu Iuda 2 Sam.

5. 5.

CAPITIS DECIMIQUARTI

Argumentum, & Partitio.

Historia belli quinq; regum orientalium contra quatuor regulos Pentapolis describitur hoc capite à Mose. Primum propter Sodomæos eorumq; vicinos, homines illos malos & peccatores (vt dicebantur c. 13. 13.) qui hoc bello petiti ac fusi fugatique scelerum suorum iustas luerunt pœnas. Deinde propter Lotum, qui belli periculo implicatus & captiuus abductus similiter πλεονεξίας & imprudentia sua culpam luit, quod illectus terra pinguedine cum sceleratis habitare delegerat. Tertio: propter Abramum, cuius tum φιλοσοφία in liberando nepote, tum præclara virtus & fortitudo in persequendis ac debellandis hostibus victoribus eluxit. Denique propter Melchisedecum, qui inter præcipuos regni & sacerdotii Christi typos alibi in scriptura celebratur.

Patres sunt tres.

I. De bello Sodomitico eiusque occasione, euentu, & captiuitate Loti ac direptione facultatum eius: vsque ad ver. 13.

II. De Abrami expeditione pro liberatione Loti: & præclara victoria: vsque ad ver. 18.

III. De gratitudine regis Sodomorum, & Melchisedeci regis Salem erga victorem Abramum, deq; magnanimitate, & αὐταρχείᾳ Abrami, recusantis spolia oblatæ.

PRIMA PARS CAPITIS

Bellum Sodomiticum.

- 1 Fuit autem temporibus Amraphel regis Sinear, Arioch regis Ellasar, Cedor-Lahomer regis Elam, & Thideal regis gentium.
- 2 Fecerunt isti bellum contra Bera regem Sedom, & contra Birsa regem Gomora-Schineab regem Adama, & Schember regem Zeboim, & regem Bela: ipsa iam est Zoar.
- 3 Omnes isti sociauerunt se iunxerunt copias in valle Siddim, que iam est mare salsum.
- 4 Duodecim annos seruiuerant Cedar-lahomer, decimotertio vero anno rebellauerunt.
- 5 Quarto decimo igitur anno veniens Cedor-lahomer, & reges qui cum eo erant, percusseruntq; Rephaim in Asteroth-Karnaim, & Zuzim in Ham, & Emim in Schaua-Kirithaim.
- 6 Et Choroos in monte Seir, vsque in planiciem Paran, que est iuxta desertum.
- 7 Et reuersi sunt, ac venerunt ad En-Mispas: ipsa iam est Cades: & percusserunt vniuersum agrum, qui nunc est Amalekitarum, atque etiam Emoreum habitantem in Chazon-Thamar.

8 Itaque